

Sebija Izetbegović

Zastupnica u Skupštini Kantona Sarajevo

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

n/r predsjedavajućeg Skupštine Kantona Sarajevo

Uputiti:

Ministarstvu kulture i sporta Kantona Sarajevo

PREDMET: Zastupnička pitanja

Poštovani,

U skladu sa Poslovnikom Skupštine Kantona Sarajevo, upućujem zastupnička pitanja u vezi sa realizacijom budžetskih sredstava namijenjenih udruženjima iz oblasti kulture za 2025. godinu. Cijeneći informacije koje su dostavljene od strane više udruženja, a koje ukazuju na ozbiljna kašnjenja u realizaciji ugovornih obaveza Ministarstva, molim da se dostave precizni i dokumentovani odgovori na sljedeća pitanja:

Realizacija javnog poziva i zaključenje ugovora

1. Na osnovu kojih kriterija i po kojem pravnom osnovu je odlučeno da određeni aplikanti, iako su ispunili uslove javnog poziva, ne dobiju ugovor o finansiranju?
2. Ko je donio konačnu odluku o izboru korisnika sredstava i da li postoji zapisnik ili obrazloženje o eventualnim odstupanjima od rang-lista i preporuka stručnih komisija?
3. Molim da se dostavi kompletna lista aplikanata, sa jasno naznačenim: brojem bodova, iznosom odobrenih sredstava, statusom (ugovor zaključen / nije zaključen).

Neisplata sredstava po već potpisanim ugovorima

4. Kako je moguće da udruženja koja su potpisala ugovore za 2025. godinu do dana postavljanja ovog pitanja nisu primila ugovorena sredstva?
5. Na osnovu kojeg zakonskog ili budžetskog razloga su obustavljene ili prolongirane isplate po važećim ugovorima?
6. Da li je Ministarstvo svjesno da su brojna udruženja projekte realizovala na osnovu potpisanih ugovora, finansirajući ih putem zaduženja i pozajmica, oslanjajući se na pravnu sigurnost zaključenog ugovora?

Najave aneksa sa umanjenim iznosima

7. Da li je tačna informacija da se planira zaključenje aneksa ugovora sa umanjenim iznosima sredstava, iako su projekti već realizovani u punom obimu?
8. Na osnovu kojeg pravnog osnova je moguće retroaktivno umanjivati iznose iz već potpisanih i važećih ugovora?
9. Ko će snositi odgovornost za eventualnu štetu nastalu udruženjima zbog umanjenja već ugovorenih sredstava?

Budžetska odgovornost

10. Da li su sredstva za ove namjene bila planirana i usvojena u Budžetu Kantona Sarajevo za 2025. godinu?
11. Ako jesu, gdje su ta sredstva trenutno raspoređena i zbog čega nisu realizovana u skladu sa ugovorima?
12. Da li postoji rizik da će doći do potpunog izostanka isplate sredstava, te da li je Ministarstvo planiralo eventualne korektivne mjere?

Obrazloženje

Potpisani ugovor između Ministarstva i korisnika sredstava predstavlja pravno obavezujući akt i stvara legitimna očekivanja kod udruženja koja realizuju projekte u javnom interesu. Svako odstupanje od ugovornih obaveza, bez jasnog pravnog osnova i bez prethodnog informisanja korisnika, narušava pravnu sigurnost, povjerenje u institucije i stabilnost kulturnog sektora.

Kultura nije budžetski višak – ona je javni interes.

Molim da se odgovori dostave u zakonom predviđenom roku, uz relevantnu dokumentaciju.

S poštovanjem,

Sebija Izetbegović

zastupnica u Skupštini Kantona Sarajevo

